

Merr will joo nit unhöflich soi

Als merr kerzlich zum Esse oigelade warn, gesse unn gedrunke unn noch e bisje zesomme gesotze hatte, hott mich die Hausherrin gefroocht: Unn, wars Esse gut? Dess hawwe merr uns nemlich bringe losse.

Unn wie dess so iss: Wenn merrs Schnitzel unn die Kadoffele grad so enunnerkriecht hott, sacht merr dess joo nit; merr will joo nit unhöflich soi, drickt sich also um die Wahrheit erum unn gibt zur Antwort: Doo hott sich ooner vill Mieh gewwe – unn gonz billich war dess sicher aach nit!

No ja, so ebbes odder so was Ähnliches kimmt halt immer widder vor. Doo hawwe doch de Karl, de Schorsch unn ich om Fassendachsdinnsdaach in de Eiseboostrooß gestonne unn hawwe uns de Umzuch oogeguckt. De Zuch iss ab unn zu emol stehgebliwwe, unn grad alser vor uns zum Stehe kam, gucke merr uff so e riesich Wond von em Waache, wo dess Wickere Door zum Roigau unn de Brickeheiliche von Weilbach druff iss.

Ich bin emol um de Waache erum gonge unn habb gesehe, dass uff de onner Seit Flerschem von Middaach her ze sehe iss. Also mir drei gucke geeche die Wond, awwer de Schorsch hott alls die Händ geschwenkt unn Hall die Gail gerufe, obwohl ich kooner gesehe habb, der em Antwort gewwe hott. Deshalb hawwe mir zwaa de Schorsch dumm oogeguckt unn uff oomol hott de Karl gefroocht: Schorsch, warum winksden immer unn rufst Hall die Gail? - uff dem Waache iss doch kooner druff! Hosde widder doi Brill nit uff, dassde dess nit siehst?

Awwer de Schorsch hott sich nit störn losse und hott alls weiter gewunke unn gerufe, bis de Zuch widder weider gonge iss. Doo sacht de Schorsch unn iss gonz außer Adem: Dess habb ich doch schunn om Sunndaach gesehe, dass doo kooner druff iss. Awwer bis heit hatt ich Zeit ze iwwerleeche warum nit, unn deshalb habb ich alls gewunke unn Hall die Gail gerufe.

Ei warum dann, hawwe merr de Schorch gefroocht.

Ei, sacht de Schorsch, ich denk merr, so en Waache ohne Leit, naa! Unn doo bin ich druffkumme: In dene Wänd sinn kloone Löcher, doo hocke junge Leit dehinner, weil doo werd e Stadistik gemacht, wer Hall die Gail ruft unn wer nit. Unn de Waache iss vollgestoppt mett so elektronische Dinger.

Du moonst, doo wern Studente drin mettem Lepptopp, mettem Hall-die-Gail-Messgerät, em Applausmonitor unn em Stimmungsbarometer?, habb ich de Schorsch gefroocht.

Ja, sacht der, dess stell ich mir so vor, heit werd joo alles gezählt unn gemesse. Unn doo solls nit soi, dass ich doo erum stehe due, ess Maul nit uffmach unn die Händ nit beweech.

Doo hawwe merr uns oogeguckt, de Karl unn ich unn hawwe gedenkt, wenn de Schorsch recht hott, dann sinn mir zwaa widder emol schee uffgefalle, weil merr nor dumm geguckt hawwe.

In dem Aacheblick kimmt de Hubert vorbei unn froocht: Na, Hannes, ist der große Wagen nicht gut?

Druff habb ich gesacht: Doo hott sich ooner vill Mieh gewwe – unn gonz billich war dess sicher aach nit!

Eiern Honnes